

ne l'andar e nel ritorno; et cussi a Bologna el vescovo di Trevixio di Rossi, governador di quella città per nome di la Chiexia, oferendosi di novo a ritornar a la legation.

Di Spagna, fo letere di sier Gasparo Contarini orator nostro, date . . . , a dì primo Octubrio. Come el vien de quì domino Hironimo Adorno per nome di la Cesarea Maestà; et colòquii hauti col Gran Canzelier. *Item*, manda una letera copiosa di nove de India, *ut in ea*. La copia di la qual scriverò qui avanti.

Di Roma, di sier Alvixe Gradenigo orator nostro, di 28 Octubrio. Come la peste continuava de li grande, et cussi come prima il Papa dava audientia in camera dil papagà con stange, cussi dà a una fanestra; nè cardinal, nè orator li parla altramente. Scrive dil venir quì di domino Hironimo Adorno orator cesareo, e colloqui hauti col Papa. *Item*, di le nave dovea andar a Rhodi per sussidio. Il galion è zonto a Napoli, li homini e fanti smontadi, etc.

Da poi disnar, fo Colegio di Savii.

A dì 4. Tutta la matina e il zorno piovete, et nulla fo da conto. Da poi disnar, fo Colegio di Savii.

A dì 5. *Etiam* fo grandissima pioza, et poi disnar, fo Consejo di X con la Zonta, et preseno di una balota che sier Hironimo Iustinian qu. sier Marin, e sier Andrea Dandolo qu. sier Alvixe fosseno acetadi in Pregadi et haver il titolo come li altri, prestando ducati 400.

A dì 6. Havendo refudado sier Lodovico Falier, è ai X officii, qu. sier Thomà, orator in Ingaltera da poi che havia acceptado, fu terminato far hozi in locho suo.

Da poi disnar, fo Pregadi et fo il Doxe. *Fo leto letere di rectori di Bergamo.* Come sguizari hanno mandato a dimandar al ducha di Milan vietuarie et li ha risposto non ne haver, *unde* loro sdegnati voleno venir a l'impresa di Milan.

Fu posto per tutto il Colegio restoro di ducati 100 a Antonio Calson dazier di Salò, *ut in parte*. Et fu presa.

Fu posto per li Consieri, che per li dannizati di la nave Mosta, tutto il Collegio vengi con le soe opinion al Consejo. 122, 40, 5.

307* *Di Brexa, di sier Marco Loredan podestà e sier Lorenzo Bragadin capitano.* Come, in execution di le letere haute da la Signoria nostra, hanno mandato a Caravazo et li intorno per veder s'il veniva di fanti spagnoli venuti su l'armata dil Papa in Italia, *unde* hanno nulla esser,

I Diarti di M. SANUTO. — Tom. XXXIII.

imo che quelli capi doveano andar a Vigevene dal ducha di Milan et signor Prospero; e altri avisi. *Etiam, di Crema, di sier Alvixe Foscari podestà et capitano fo letere in conformità, ut supra.*

Fu posto per li Savii, una lettera a sier Zuan Badoer dotor, cavalier, orator nostro, in risposta di sue. Sotto parole zeneral, che havendo inteso la volontà de la Christianissima Maestà di venir a l'impresa di Milan, et averà sguizari; che ad ogni suo piacer vengi che 'l sarà ben venuto. E venendo nui non li mancheremo di la ubligation nostra, e ne piazze dil partir di la Franza di englesi; con altre parole, etc. Presa.

Fu posto, per li ditti, far hozi orator in Anglia, et poi orator in Franza in loco del Badoer con ducati 120, atento fo electo sier Lorenzo Bragadin, qual è andato capitano a Brexa. Presa. 166, 20, 0.

Fu posto, per li Savii di terra ferma e ordini, una letera a li capitani di Baruto et Alexandria, che cussi como li fo scritto andasseno uniti a trovar il Zeneral, cussi cadauna muda vadi separatamente et trovi il Zeneral, dal qual torà ordine de andar a loro viazo. Presa, 171, 14, 4.

Fu posto per li Consieri alcune taie, *ut in libro*.

Fu fato per scurtinio orator in Ingaltera in luogo di sier Lodovico Falier refudò, sier Zuan Antonio Venier è ai X Savii, qu. sier Giacomo Alvixe. Il scurtinio sarà quì avanti.

Fono electi per boletini li 7 di XV Savii manchavano a elezer. Tolti numero 14 rimaseno li infrascripti. Il scurtinio è quì avanti.

Sier Gregorio Barbarigo, fo al luogo di procurator, qu. Serenissimo.

Sier Marco Cabriel, fo consier, qu. sier Zacaria.

Sier Domenego Capello, fo cao dil Consejo di X, qu. sier Carlo.

Sier Nicolò Zorzi, fo capitano a Brexa, qu. sier Bernardo.

Sier Andrea Foscolo, fo podestà e capitano a Crema, qu. sier Marco.

Sier Thomà Moro, è di Pregadi, qu. sier Alvixe.

Sier Nicolò Mozenigo, è di Pregadi, qu. sier Francesco.

Scurtinio di Orator in Ingaltera.

Sier Marco Gradenigo dotor, fo di Pregadi, qu. sier Bartholomio. 69.129